

**Broj: X-KR-08/494-1****Sarajevo, 10.07.2009. godine****U IME BOSNE I HERCEGOVINE!**

Sud Bosne i Hercegovine, Odjel I za ratne zločine, u vijeću sastavljenom od sudije Mire Smajlović kao predsjednice vijeća, te sudija Senadina Begtaševića i Carola Peralte, kao članova vijeća, uz sudjelovanje pravnog savjetnika Šaćira Hadžića u svojstvu zapisničara, u krivičnom predmetu protiv optuženog Blagoja Golubovića zbog krivičnog djela Zločini protiv čovječnosti iz člana 172. stav 1. tačka a), u vezi sa članom 180. stav 1. Krivičnog zakona Bosne i Hercegovine (u daljem tekstu KZ BiH), nakon održanog usmenog i javnog glavnog pretresa, u prisustvu tužitelja Tužilaštva BiH Behaije Krnjića, optuženog Blagoja Golubovića i njegovog branioca Bajre Čilića, advokata iz Sarajeva, donio je i javno objavio dana 10.07.2009. godine slijedeću:

PRESUDU**Protiv optuženog:**

Blagoja Golubovića, sina Koste i majke Milke rođ. Elez, rođen 18.04.1965. godine u Strgancima, opština Foča, sa prijavljenim mjestom prebivališta ... , po narodnosti ... , državljanin ... , po zanimanju vozač, pismen sa završenom srednjom školom, oženjen, otac troje malodobne djece, vojsku služio 1985/86 god. u Kičevu, Republika Makedonija, bez čina, vodi se u vojnoj evidenciji Foča, nije odlikovan, lošeg imovnog stanja, neosuđivan, ne vodi se drugi krivični postupak protiv njega, nalazi se na slobodi

OPTUŽBA SE ODBIJA

da je:

u vremenskom periodu, od aprila mjeseca 1992. godine do mjeseca februara 1993. godine, u kojem se odvijao široki i sistematičan napad vojnih, paravojnih i policijskih snaga tzv. Srpske Republike BiH, a potom Republike Srpske, usmjeren protiv civilnog nesrpskog stanovništva općine Foča, znajući za takav napad, te da njegove radnje čine dio tog napada, kao pripadnik tih snaga, svjesno i voljno učestvovao zajedno sa drugim pripadnicima tih snaga u udruženom zločinačkom poduhvatu, na način da je učestvovao u izvršenju zajedničkog plana u namjeri ostvarivanja zajedničkog cilja kojeg su činila namjerna lišavanja života (ubistva) osoba nesrpske nacionalnosti, tako što je:

1. tačno neutvrđenog dana, krajem mjeseca maja 1992. godine, zajedno sa grupom od dvadesetak pripadnika oružanih snaga Republike Srpske došao u blizinu mjesta Podkolun, opština Foča, nakon čega su se on, te Vuković Ranko, Vuković Rajko i Golubović Ranko, svi naoružani sa automatskim naoružanjem, izdvojili iz grupe, te ušli u selo, dok su se ostali pripadnici grupe rasporedili oko sela držeći stražu, a zatim došli do porodične kuće Hukara Avdije sina Hasana , rođenog 1909. godine, kojeg su zatekli u kući, te u namjeri da ga liše života, jedan ili više njih iz grupe su iz vatrenog oružja ispalili nekoliko projektila koji su pogodili oštećenog u predio grudnog koša i glave nanijevši mu prostrijelne rane od kojih je kod oštećenog nastupila smrt, a zatim krenuli putem kojim su napustili selo, da bi potom idući tim putem na jednoj njivi, koja se nalazi blizu puta, zatekli Bekrija Mejru kćer Hasana, rođenu 1927. godine, koja je okopavala krompir, a zatim u namjeri da je liše života, jedan ili više njih iz grupe su iz vatrenog oružja ispalili nekoliko projektila koji su pogodili oštećenu u predio grudnog koša nanijevši joj prostrijelne rane od kojih je kod oštećene nastupila smrt, da bi potom se ponovo satali sa ostatkom grupe, te se nakon toga svi udaljili u napozantom pravcu,

dakle,

u okviru širokog i sistematičnog napada vojnih, paravojnih i policijskih snaga tzv. Srpske Republike BiH, usmjernog protiv civilnog nesrpskog stanovništva općine Foča, znajući za takav napad, te da njegove radnje čine dio toga napada, kao pripadnik tih snaga, djelujući sa drugim pripadnicima tih snaga, a posebno Vuković Rankom, Vuković Rajkom i Golubović Rankom, svjesno i voljno učestvovao u osnovnom obliku, odnosno prvoj kategoriji udruženog zločinačkog poduhvata koji je imao zajednički cilj, i to lišavanje života (ubistva) civilnih osoba nesrpske nacionalnosti, tako što je učestvovao u izvršenju zajedničkog plana koji je podrazumijevao činjenje ubistava nad civilnim osobama nesrpske nacionalnosti,

čime bi počinio krivično djelo Zločini protiv čovječnosti iz člana 172. stav 1. tačka a), u vezi sa članom 180. stav 1. KZ BiH.

Na osnovu odredbe člana 189. stav 1. ZKP BiH troškovi krivičnog postupka padaju na teret budžetskih sredstava Suda.

Na osnovu odredbe člana 198. stav 3. ZKP BiH oštećeni u ovom postupku sa cventualnim imovinsko-pravnim zahtjevom se upućuju na parnicu.

O b r a z l o ž e n j e

Optužnicom Tužilaštva BiH, broj KT-RZ-30/06 od 10.02.2009. godine, koja je potvrđena dana 13.02.2009. godine, Blagoje Golubović optužen da je počinio krivično djelo Zločini protiv čovječnosti iz člana 172. stav 1. tačka a), u vezi sa članom 180. stav 1. Krivičnog zakona Bosne i Hercegovine.

Dana 06.07.2009. godine Tužilaštvo BiH je obavijestilo Sud da odustaje od optužnice protiv optuženog Blagoja Golubovića, te stavilo prijedlog da se prema optuženom ukine mjera pritvora.

Na glavnom pretresu održanom 10.07.2009. godine tužilac je izjavio da odustaje od optužbe u ovom krivičnom predmetu.

Odredbom člana 283. stav 1. tačka b) ZKP BiH propisano je da će Sud donijeti presudu kojom se optužba odbija, ako je tužilac od započinjanja pa do završetka glavnog pretresa odustao od optužnice.

Polazeći od naprijed iznijetog, imajući u vidu odustanak ovlaštenog tužioca od optužnice, valjalo donijeti presudu kojom se optužba odbija, u smislu člana 283. stav 1. tačka b) ZKP BiH.

Na osnovu odredbe člana 198. stav 3. ZKP BiH oštećeni u ovom postupku sa eventualnim imovinsko-pravnim zahtjevom se upućuju na parnicu.

Odluka o troškovima krivičnog postupka temelji se na članu 189. stav 1. ZKP BiH kojom odredbom je između ostalog propisano da kad sud donese presudu kojom se optužba odbija da će u presudi izreći da troškovi krivičnog postupka iz člana 185. stav 2. tačke a) do f) ZKP BiH, te nužni izdaci optuženog i nužni izdaci i nagrade branitelja padaju na teret budžetskih sredstava.

Iz navedenih i obrazloženih razloga odlučeno je kao u izreci.

ZAPISNIČAR
Šaćir Hadžić

PREDSJEDNIK VIJEĆA
SUDIJA
Mira Smajlović

PRAVNA POUKA: Protiv ove presude može se podnijeti žalba Apelacionom vijeću Suda BiH u roku od 15 /petnaest/ dana od dana prijema pismenog otpravka presude.